

佛說除蓋障菩薩所問經卷第十七

宋西天三藏朝數大師譯廣少師傳義翻法譯等奉詔譯

復次善男子菩薩若修十種法者善知勝義
諦何等爲十一者成就不生法故二者成就
不滅法故三者成就不壞法故四者成就不
出不入法故五者成就超言境界故六者成
就無言詮法故七者成就無戲論法故八者
成就不可說法故九者成就寂靜法故十者
成就聖者法故何以故善男子勝義諦理本
無壞故若佛出世若不出世本自如是不生
不滅不出不入非文字所說非文字詮表離
諸戲論取證善男子此勝義諦湛然寂靜不
可言說唯諸聖者自內所證又善男子此勝
義諦若佛出世若不出世本無所壞以是義
故有善男子發正信心清淨出家剃除鬚髮

被服袈裟既出家已發勤精進修諸善行如
頭覆繒帛救其火然求法亦爾善男子若不
得勝義諦法即所修梵行虛無果利如來出
世亦無果利是故善男子若有勝義諦可說
名爲菩薩了知勝義善男子菩薩若修如是
十種法者即善知勝義又善男子菩薩若修
十種法者善知緣生何等爲十一者知諸法
空二者知法無所有三者知法不真實四者
知法如像五者知法如影六者知法如響七
者知法如幻八者知法不久停九者知法動
搖十者知法皆從緣生菩薩作是思惟此法
如是空如是無所有如是不真實如是如像
如影如響如幻如是不久停如是動搖如是
緣生雖復了知諸有生法決定不住速趣破
壞而亦建立生法滅法及彼住法又復惟忖

如是諸法從何緣生從何緣滅作是思惟已乃知是法從無明生因無明有以其無明而爲先導依止無明依無明已諸行乃生依諸行已而有諸識由有識故乃立名色立名色故乃有六處六處有故諸觸隨生以有觸故乃起於受由其受因愚夫生愛愛逼迫故而起於取以有取故纏縛於有由有故生生故有老有老法故補特伽羅士夫皆死依法故而起憂悲苦惱愁歎如是乃得一大苦蘊集是故智者應當勤力斷除無明破壞無明拔無明根滅無明法由無明滅故即能除滅無智之者所依止法譬如命根滅已餘根皆滅無明滅已無智所依諸法皆滅亦復如是何以故無無智故乃無積集一切煩惱不轉諸趣以無煩惱轉諸趣故即能斷滅生死之

因近於涅槃善男子菩薩若修如是十種法者善知緣生又善男子菩薩若修十種法者能自了知何等爲十一者菩薩善自觀察今我此身何族中生婆羅門族耶刹帝利族耶長者族耶而或高尚富貴族耶其或卑賤下種族耶若在高尚富貴族生我當不恃此緣而生憍倨設使於其卑賤族生當起是念由我宿昔造雜業故生如是族即以此緣厭離於世生厭離故而求出家二者菩薩既出家已即當觀察我今爲何義故而求出家乃自思忖我今出家自得度已令他亦度自解脫已亦令他人悉得解脫以是緣故終不生於懶惰懈怠三者菩薩如是觀察我今出家應斷一切罪不善法滅盡無餘我若已斷諸不善法生大歡喜適悅慶快我若未斷諸不善

法應當策勤速令除斷四者菩薩如是觀察我今出家宜應廣大增長修習一切善法我若已能廣大增長一切善法心生歡喜適悅慶快我若曾未增修善法應當策勤速令增長五者菩薩如是觀察我若依止於師尊已

即能增長一切善法壞滅一切不善之法由此因緣於其親教師所不以甚聞多聞有智無智持戒毀戒應當悉起佛大師想於彼師尊之所愛樂信重恭敬承事亦於軌範師所同彼親教之師尊重恭敬六者菩薩如是觀察我若依止軌範師已當於菩提分法未圓滿者而能圓滿諸有未斷一切煩惱而悉能斷是故於彼軌範師所恭敬承事如親教師想心大歡喜而彼師尊能以正道一切善法攝受於我不以邪道不善之法而爲攝受七

卷八

者菩薩如是觀察誰是我師乃審思惟一切智者是我大師彼一切明了悲愍世間起大悲心作大福田能爲天人阿脩羅世間等師以是緣故生大歡喜適悅慶快又復思惟若佛世尊爲我大師我實得大善利如佛世尊施設學道我當盡其壽命奉教修學如聞隨轉終不違越八者菩薩作是思惟我當從誰而行乞食徧伺察已我應於彼婆羅門刹帝利庶民之家周行求乞今彼施食獲大果報成大義利具大威德我以此緣令彼得果故從乞食九者菩薩作是思惟彼婆羅門刹帝利等爲起何想而施我食如是審察彼婆羅門刹帝利等必應於我起沙門想起艾芻想起福田想故施我食我今宜應積集修行沙門功德艾芻功德福田功德十者菩薩作是

思惟我當云何而能出離無始生死如是審察一者我得成苾芻相斯爲第一出離生死二者我得成就苾芻所有功德斯爲第二出離生死三者我能發起精進捨離懈怠修諸善行證得法性斯爲第三出離生死四者偏脩諸行乃至成佛化度有情斯爲第四出離生死菩薩若能如是審諦常所觀察是即名爲善自了知善男子菩薩若修如是十種法者善知世間何等爲十一者見高倨人能自卑下二者見我慢人能離憍慢三者見詭曲人能立正直四者見妄語人爲說實語五者見惡語人爲說愛語六者見麤猛人起柔軟相七者見恚惡人能多忍辱八者見毒害人爲起慈心九者見苦惱人爲生悲愍十者見慳

憊人爲行布施善男子菩薩若修如是十種法者善知世間又善男子菩薩若修十種法者得生清淨諸佛刹土何等爲十一者具戒清淨不斷不雜復無染汙戒行成就二者行平等心爲一切有情設平等方便三者成就廣大善根非尠少故四者遠離世間名聞利養等事復不染著五者具於淨信無疑惑心六者發勤精進捨離懈怠七者具修禪定無散亂心八者修習多聞而無惡慧九者利根利慧無暗鈍性十者廣行慈行無損害心善男子菩薩若修如是十種法者即生清淨諸佛刹土爾時除蓋障菩薩白佛言云何世尊爲具修十法乃得生耶爲隨修一法無所缺壞亦得生耶佛言善男子若隨修一法不斷壞無雜無染清淨潔白即能成就餘諸法

行善男子此中意者若能具修諸法無所缺減生淨佛刹決定無疑又善男子菩薩若修十種法者不染胎藏垢穢而生何等爲十一者修治如來形像二者嚴飾破故塔廟三者妙香塗治如來寶塔四者以妙香水洗沐佛像五者泥飾塗補掃除濺灑如來塔地六者恭事父母七者恭事軌範之師及親教師同梵行等八者雖復如是無所希望九者即以如是所有善根而用迴向願以此善普令一切有情不染胎藏垢穢而生十者深心志固善男子菩薩若修如是十種法者得不染胎藏垢穢而生又善男子菩薩若修十種法者即能在家出家何等爲一者得無所取二者不雜亂住三者棄背諸境四者遠離諸境一切愛著五者不染諸境所有過失六者能

於如來所設學門恭敬修習加復勤力而無厭足土者雖復少分得其飲食衣服卧具病緣醫藥心常喜足八者隨得應器衣服離諸取著九者厭離諸境常生怖畏十者常勤修習現前寂靜善男子菩薩若修如是十種法者即能在家出家

佛說除蓋障菩薩所問經卷第十七